

وليد المصري

مين حبا قدي

أشعار بالعامية المصرية

الطبعة الأولى ٢٠١٧

بطاقة الكتاب

عنوان المؤلف : مين حبها قدى
المؤلف : وليد المصرى
التصنيف : أشعار بالعامية المصرية
رقم الإيداع : 23003 - 2017
عدد الصفحات : 100 صفحة
رقم الإصدار الداخلى : 69
تاريخ الإصدار الداخلى : 11 / 2017 طبعة أولى
تصميم الغلاف والتنسيق : دار النيل والفرات للنشر والتوزيع

جميع حقوق الطبع والنشر محفوظة للشاعر، ولا يحق لأى دار نشر
طبع ونشر وتوزيع الكتاب الا بموافقة كتابية وموثقة من الشاعر

دار النيل والفرات للنشر والتوزيع

سجل تجارى : 58365
بطاقة ضريبية : 165-5-00031-572-01-35
رقم التسجيل : 202-662-544 2017-7
E-mail: alnile waalforat@yahoo.com
twitter: النيل والفرات
youtube: alnile waalforat@yahoo.com
facebook: alnile wa alforat
هاتف : 01011256943 - 01116202218 - 01202541192



الشرقية - العاشر من رمضان - مجاورة ١٣ - عقار ٣٠٤ - الدور الثانى - أمام سنتر ١٣

إهداء

الى روح الراحل الطيب البسيط
اللى كان عايش وراضى بقليله
سبب وجودى فى الحياه.....أبى
الى روح من حملتنى تسعة اشهر بداخلها
وارضعتنى حنانا ودفنا فى احضانها
ست الحبايب..... أمى
الى روح من وقف بجانبى
وساعدنى كثيرا أختى سعد
الى روح من ضحوا بأرواحهم
من أجل الوطن
الى شهداء العيش والحرية والكرامه
من جيش وشرطه وشعب
الى كل اصدقائى واخوتى واقاربى
ومن حولى جميعا
الى الشعراء والمبدعين
الى ابنائى وزوجتى
أنتم دائما فى القلب
أهدى اليكم جميعا ديوانى

وليد المصرى

مفتتح

أنا الإبن اللى عاش
يحلم بفجر جديد
أنا اللى بكتب لك
وبوهب لك بدمى حياه
أنا الفرحة اللى قتلوها
فى يوم العيد
وكان نفسى أعيش
فيكى ومقولش الآه
أنا النعش اللى كان
طاير وإسمى شهيد

هويس

يا بحر بسيط مانيش فاعل
ولا مفعول بيتسيط ويتعامل
أنا الفعل اللى صان عهدك
وعاش بالحب يتعامل
ما بين عشقى وكونى هويس
بشوف الصوره واتفاعل
وبتغير مع الأحاسيس
محدث عمره كان كامل
أشوف ليلى بتعشق قيس
وأتوه وأسرح فى مملكته
بقيت واحد من المهاويس
بينبض قلبه من قلبك

وبيحارب فى كل خسيس
يحطم فيكى ويذل لك
ياحب وعشق م المواريث
بحبك حب موصوف لك
ومكتوب لى بدون تأسيس
أكون فارس يشيل اسمك
وأكون ليكى بطل ورئيس
وحلمه يعيش مع سيرتك
يحوش عنك كتير كوابيس
ولا يكونشى فى يوم خصمك
مانيش كومبارس فى الكواليس
وبيمثل فى دور عاشقك
أو حد م المحابيس
بيبيع ويشترى فى جسمك
أنا أحمس وعنخ آمون ورمسيس

أنا أزوريس ياست هاميس
وكل اللى يوم عشقك
فكونى ذى ما تكونى
وعيشى للى يخلص لك

مركب العشاق

الحب فى القلوب ساكن
ومدوب روحه فى العاشقين
موجود فى كل الاماكن
بس البشر تايهين
ما بين الحلم والصدفه
راكبين فى مركب ومتبتين
والنبض لو يعدل الدفه
تلقانا فى الغرام دايبين
كثير بنكدب ونصدق الكدبه
وبنفرق ما بين قلبيين
فى بحر دموع ياما شوفنا
عشاق كثير مساكين
وحلم العمر يخطفنا

وإحنا مش حاسين
ماشيين فى سكة سفر
منعرفشى لفين رايعين
شربنا من كاس المر
وبحبال الأمل متعلقين
بنتحلى بطعم الصبر
وسط الظلام متغربين
وعشان نطول القمر
لازم نضحى سنين

نفس المكان

هنا فى نفس المكان

على دكه فى جنبه

وسط ورد وريحان

كل مره اعدى فيها

أفتكر أيام زمان

أحلى قصه لحبنا

وحكايات عشقى اللى كان

ذكريات محسوبه فى عمرنا

عشنا فيها إنتى وأنا

كنا نشعر بالآمان

وبرغم الفراق

لسه القلوب عايشين

جوانا اشتياق
من سنين وسنين
كنا نقعد بالساعات
والأيدين متشبكين
راميه حضنك جوه حضنى
وسط زقزقة الكناريا
سيمفونيه تهز قلبك ويا قلبى
أحلى عيشه وأحلى دنيا
تحضن الشمس الصباح
وقت الغروب يبهرنا منظرها
كنت بحلم ابقى ليكى
وتبقى ليا
حب عمرى وماتغيش
عن عنيا
بس يظهر إنه كان

لا بادیکی ولا بادیا
نفترق من غیر میعاد
سایبه عشقك جوه قلبی
ذکری حلوه ماتتنسیش
هنا فی نفس المكان
أنا وإنتی حلمنا نعیش

مين حبها قدى

أنا العاشق
وأنا المعشوق
أنا الغرقان
فى بحر الشوق
تاخذنى الموجه
وتجيبنى
لشط غرامك
أصحى وأفوق
مانيش فى الحب
روميو
ولا فى الصبر
أيوب
أنا وإنتى اتنين
وعشقوا

حكم القدر
مكتوب
بحبك بدايه
وأحبك نهايه
وحبك معايا
فى مليون حكايه
ومقدرش أفارقك
أو أرحل بعيد
لأنك لقلبي
طبيبى ودوايه
وزارعه الحب
جوايا
وطارحه فى قلبى
الحنان
مين اللى يقدر

يكرهك
وحضنك نبع
الأمان
أنا المولود
على إديكى
ورضعت منك
إيمان
بحبك حب
خلانى
بتاج العشق
سلطان
بحبك مهما قالوا
فقيره
واحبك لو يقولوا
أسيره

واحسك واشوفك
بقلبي وعيني
حببتي وحياتي
وأجمل أميره
بحبك في نسمة
وسهره جميله
في نيلك وليلك
وبحرك وصيفك
في بنت بصفائر
وعيون كحيله
ومطره في شتاكى
بتحضن ولادك
بحبك وشايفك
أمي الأصله
وعايشك وحاسك

فى أجمل قصيده
بسيبك وبرحل
وأشرق وأغرب
وبندم وبرجع
بشوقى إلكى
وتنزل دموعى
فى لحظة ما أقرب
لأرضك وناسك
وكل اللى فىكى
بحلوك ومرك
حببتى الكبيره
فخور إنى منك
وعاشقك وليكى

سؤال وجواب

وبتسألینی حبی لیکى

قد إیه

بصی ف عنیا تعرفی

إنتی بالنسبالی إیه

حبك إنتی جوه منى

له طعم وشکل تانى

ساکن جوه قلبی

بیجرى فى دمی

وشریانی

حبك إنتی

بالعالم واللى فیه

نبح الحنان والوفا

حُضن الأمان والدفا
عشرة سنينى اللى رايحه
وسنينى اللى جايه
اللى صابره وواقفه جنبى
واللى شايله معايا همى
لو هقول أنا والا هحكى
هحكى إيه أنا ولا إيه
وأما جيت أكتب نهايه
إكتشفت إن اللى بينا
حب

أقوى من السنين
حب عايش جوه منى
وإختصرته فى جملتين
شريكة حياتى المخلصه
أم العيال الطيبه

دواير حياه

دواير تلف فى دواير

نبدئها بحياه

والبشر ساير ودائير

فى كل اتجاه

تايهين فى دوامه

وسط بحر كبير

تاخذنا الموجه وتجبينا

وبنعافر فى لقمة عيش

وحلم العمر بيسبنا

ومحلمناش نكون دراويش

بنتشعلق وطوقنا نجاه

نشيل الهم ف قلوبنا

وقولة آه

ونستحمل جراح وآلام

يفور الدم فى عروقنا
نفوق على الأوهام
خيوط بدايه ونهايه
وطريق مخيف
فساد بيهزم جوانا
الطيب والضعيف
توابيت ودافنه كل يوم
وإذاعه تعلن موت الشريف
متغربين جوه الوطن
وبندعى فى الملكوت
نصرخ مهما نصرخ
محدث بيسمع صوت
دايرين نحارب فى المحن
وسابقنا قطر الموت
والجته دابت م العفن

والروح بتنسحب فى سكوت
عيونا تبكى بدموع
فى شريط لماضى وذكريات
كوابيس تلازم فى العقول
وتغير المسارات
وبين الحياه والموت
تاقت المسافات
أحزان بتسكن فى البيوت
وقلوبنا مليانه بأهات
عزف الكمان ع الجرح
وداس بالحزن ع الاوتار
فى ليل طويل دندن فى لحنى
الصبر طال م الإنتظار
طلع النهار والضهر محنى
تحت الشجر فى العصارى

صرخ النأى لأوجاعى
وان يوم الشعر فرحنى
هقوله مافيش داعى
صوت القلب كلمنى
وجهز حفل لوداعى
خلاص حبيبتى ماتحلميش
جرحك فى علمنى
أرجوكى سيبينى ماتعنديش
وتموتى الحب اللى باقى
إدينى فرصه إنى اعيش
أو تكتبى شهادة وفاتى

شدى حيلك

شدى حيلك يابلد

مايهمكيش

شد حيلك ياولد

ولا تنحنيش

بكره راجع حق اخوك

والوطن هيعيش

مهما حاولوا يفرقونا

الأمريكان

مهما عملو ألف داعش

جوه ليبيا أو فى سوريا

والعراق

مصر تقدر تنتصر

طول ما فيها أوفياء

وطول ما فيها زعيم وجيش

مصر الطيبه المؤمنه

هتعيش

رغم أنف الاغبياء

شهيد الوطن

صرخة شهيد الوطن

لحظة خروج الروح

نطق الشهادة وقال

كلام بصوت مجروح

وهبت روحى للوطن

علشان يعيش

واجهت الرصاص بصدري

ولا همنيش

كان نفسى أشوفك بلادى

فى أمن وآمان

مش بحور من دم وآلام

ما بتنتهيش

علمونى فى مدرستنا

إزاي اواجه أى حاجه
بس نسيوا يعلمونى
أحمى ضهرى من الخيانه
من اللى عاشوا سنين فى خيرك
وبألف خنجر يطعنوكى
ذنبنى إيه غير إنى واقف
أحمى أرضك وأحمى عرضك
وبكل قسوه بيقتلونى
إمسحى دموعك يا غاليه
ما تحزنيش
وماتر عlish إن كنت
سبتك عشانها
ما إنتى اللى من صغرى
زرعتى فىا حبها وحنانها
إبنك شهيدك كان بطل

والحق راح يرجع أكيد
مكتوبلى أقابل ربنا
وفى الجنه أكون لك شهيد
قال الشهيد

خاللى بالك من ولادى وصبريهم
علميهم يعنى إيه كلمة وطن
وإن موتى كان عشانهم
خوف عليهم من الزمن
إحكى ليهم يامه عنى
وإروى ليهم فى التاريخ
إزاي رصاص الغدر صابنى
وإزاي بقيت شهيد جريح
وإن كانوا قالوا
رضاكى عنى من العباده
أوعى تنسى تقولى ليهم

معنى الشهاده
وإن حب الوطن
برضوا من العباده
وأرفعى راسك لفوق وإفرحى
بكره هتشوفى الوطن سعيد
وولاده يدوكى التحيه مطرحى
مصر يامه لما تصرخ
وتقول ولادى
واجب علينا كلنا
نلبي نداها
نوهب حياتنا وعمرنا
وروحنا فداها
نرفع علمها ونهتف عشانها
بلادى بلادى
أفديكى بدمى وأفديكى بحياتى

بلادی بلادی
عشانك اضحى بشهاتى ووفاتى

إرهاب

دقت طبول الحرب
ملعون ابوك إرهاب
مالكوش لا دين ولا قلب
غاويين دمار وخراب
فجر كمان واقتل فى ناس
إعمل قنابل بالريموت
إمسك سلاح واضرب رصاص
مش هخاف انا أى موت
ياللى بتهدر دم المصرى
وبتدارى فى إسم الدين
فاكر رأيك هوه الصح
وكل الناس حواليك كافرين
دينك قالك تهدر دم
تقتل ناس واقفين يحموك

لو بتفكر بس بعقلك
تلقى الجندى أخويا وأخوك
أصلك نذل وطبعك خاين
ياللى بتنشر فى الإرهاب
قبل ماتضرب أى رصاصه
تهدم بيت وتيتم أسرته
كنت تفكر مليون مره
ليه بتقلبها دمار وخراب
بكره مصيرك يبقى مصيرهم
لما تنول حكم الإعدام
وانت بإيدك راح تختار
لما تقابل رب العزه
وتلقى مكانك يوم الآخره
هما فى جنه
وانت فى نار

شعب القنال

ياشعب القنال
ياشعب البطولة
والشهامه والنضال
ياللى كنتوا درع مصر
من العدو والإحتلال
ياللى بيكوا
مصر دايمآ تفتخر
باللى ماتوا واللى ضحوا
وكل نقطة دم سال
ياللى أرضك
كل حبة رمل فيها
مرويه بدم الابطال
ع السمسيميه بتعزف الحانك
بتغنى وبتوصف احزانك

وطريق كفاحك ونضالك

فيه الفرحة وفيه الموال

ياشعب القتال

بورسعيد

بورسعيد يادره

وارضك حره

عدوان ثلاثى

إتصدتلوا بكل جراه

لما خرجت نسائك

تساعد رجالك

ومهمكيش مين يموت

ومين يعيش من ولادك

ولسه الشهده

بتموت على ارضك

ولسه برضوا

بتضحى بحياتك
وكل اللي همك
هو حبك لوطنك
وعشقك لذاتك
بور سعيد يادره وأرضك حره

إسماعيليه

إسماعيليه عروس القتال
أبطال طول عمرهم
فى فنون القتال
وف خمسه وعشرين يناير
بشرطتها وشعبها
بنحتفل من زمان
لما كانوا أيد واحده

فى المقاومه والعدوان
دافعوا عن ارضهم
بكل مروءه وإستبسال
حريفه فى الكوره
من جيل لجيل
وشبابها كله همه
وما يعرفشى المستحيل
عنده صبر وعزيمه
وتحقيق آمال
وصدقوا اللى قالوا عنها
إسماعيليه عروس القتال

السويس

سويس يابلد الغريب
ياللى حبك فى القلوب
دايمآ قريب
وقصة كفاحك ع الجبهه
ضد العدوان الصهيونى
لو هحكى مش هقدر اوفى
لشعب باسل وبدمه لسه بيضحى
ياللى منك عبد الناصر
بدأ المشوار
وحررنا من العبوديه والإستعمار
واما الثوره قامت من جديد
كان فخر ليكى
تبقى صاحبة أول شهيد
سويس يابلد الغريب

يوم العبور

فى سته أكتوبر

تلاته وسبعين

يوم عشره رمضان

كان الميعاد

وقت الصيام

وقفوا الرجال

صامدين

بأعظم معارك

خاضتها البلاد

قالها الرئيس

العظيم السادات

إبدأ يا جيش

العروبه الجهاد

شقوا فى سماكى

ياسينا النصور
وعبروا الرجال
القناه والجسور
حطموا الموانع
دمروا الحصون
لتحيا بلادى
بيوم العبور
يوم الوفا
لخيرة الجنود
حماة الوطن
حراس الحدود
وقت المحن
كانوا الأسود
ضد العدو
ضد اليهود

شَقُوا بَارْلَيْف
المَحَال
هَزَمُوا إِسْرَائِيلَ
وَسَطَ النَّهَارِ
ضَحُوا بِحَيَاتِهِمْ
عَ الْقَتَالِ
حَرَّرُوكَ يَا سَيِّدَنَا
الْأَبْطَالِ
عَ الضَّفَةِ
رَفَعُوا الْعِلْمَ
اللَّهُ أَكْبَرُ
زَادُوا الْهَمَمَ
لَجَلْ مَا يَعُودُوا
لِبِلَادِي
بِأَعْلَى انْتِصَارِ

طول عمرک یابلدی
ولادة رجال
وجیشک رجالوا
ما تعرف محال
عزه وکرامه
وبطوله ونضال
قوه وعزیمه
وشهامه وقتال
تسلم یاجیشنا
یا حامی البلاد
یا ساکن فی روحی
وجوه الفؤاد
وخیره الجنود اللى
قالها رب العباد

خير أجناد الأرض

قبل ما تسأل إحنا مين
إقرا تاريخ المصريين
شوف كام قائد دافع عنهم
وحرر شعبه بنصر ميين
أحمس وقطرز وصلاح الدين
هزموا الهكسوس والتتار
وانتصروا فى حطين
ناصر والسادات حرروها
وانتصرنا فى ثلاثه وسبعين
سبع تلاف سنه حضاره
ولسه مكملين
عرفت إحنا مين

إحنا الجيش المصرى الحر
ياما حاربنا وياما آسينا
ياما شربنا كاسات المر
إستشهدنا وموتنا فى سينا
وإتحلينا بطعم الصبر
ودمنا يشهد بكره علينا
وهنتحاسب جوه القبر
مصر بلدنا وغاليه علينا
مهما أذوها بكل الشر
وهنفديها بضى عنينا
من إرهاب وف طبعه الغدر
واخدين عهد لنحمى بلدنا
مهما سنين العمر تمر
واللى يفكر يوم يآذيها
بكره مصيره الموت والشنق

راجع نفسك وإصحى وفكر
دينك قالك كفر وإقتل
مسلم ذيك أو كان أعزل
بكره قيامه تقوم و هتخسر
قولى ساعتها هتعمل إيه
لما فى وسط النار تتحسر
راجع نفسك وإصحى وفكر
إحنا الجيش المصرى الحر

بعشقك

بعشقك

وحبك فوق كل شئ

بعشقك

من قلب طاهر برئ

وحبك فى دمي

بيجرى فى وريدى

ساكن فى قلبي

وعايش فى روحي

لأنك حياتى

وعمرى وذاتى

وياما عشت فيكى

أحلى ذكرياتى

بعشقك

وعاشق حنانك
وعاشق زمانك
بنيلك وأرضك
وهرمك وعلمك
ومهما إختلفنا فى راينا
ووقفنا ضد بعضنا
بيجى يوم يا أمى
وحضنك يضمننا
وحنانك وعطفك
يجمع شملنا
ومهما بنبعد ونتفرق
وبنشرق وبنغرب
مهما الدنيا تلهينا
بنرجع ليكى ونقرب
ولو تطلبينى أضحى لأجلك

ما أنا إبنك شهيدك
ودمي وروحي
فداكي يا مصر
ما إنتي أُمي
وعايشه في وجداني
من وأنا طفل صغير
رضعت منك حناني
ويا ما شربت من نيلك
واكلت من خيرك
ولما كبرت بقيت
عاشق سماكي وترايك
حبيبتي يا مصر بعشقتك يا أُمي

بسمه أمل

بسم الله...بسم الأمل
بسم الشرف والعرق والعمل
حفرنا قنالنا بأيادي مصريه
أيد قويه وعفيه
أيد بتبنى وأيد تعالى
جسور الحريه
أيد تخضر أيد تعمر
أيد بتزرع أيد بتحصد
إخلاص ووطنيه
فى السويس وبورسعيد
وعروس القناه إسماعيليه
قناتنا الجديده بقت عالميه

شريان جديد للحياه
سفن رايعه وسفن جايعه
وطوق لنجاه...بفضل الله
وقياده مصريه
شعب بادر بالكفاح
واصل الليل بالصباح
كتب تاريخه بإديه
صنع المعجزات
بقرار من زعيم وجيش عظيم
كلل جهوده بإنجازات
حماها وبنائها من جديد
خضع لإرادته شعبيه
ضرب بيد من حديد
لجل ما يعيش الوطن
أمن وأمان وحرية

وخير كل يوم بيزيد
لأجياننا اللى جايه
قال حط ايدك ويا ايدى
بكره ترجع مصر اجمل
وكل فجر جديد هيجى
راح نشوف الحلم يكمل
مصر بينا هتبقى جنه
أيد محمد ويا حنا
وف رباط ليوم الدين
الإله والرب واحد
وكلنا مصريين

لمسة وفاء

لأنى إتولدت فيها
وعشت على حبها
وكبرت أحلامى بيها
ومهما هقول عنها
فخور إنى منها
وإبن من صلبها
أصل الرجولة فى ولادها
والطيبه معدن شعبها
طول عمرها أرض
البساله ومصنع رجال
فيها رمز البطوله
ونبع الكفاح والنضال

على أرضها شهد التاريخ
أعظم ملاحم في القتال
شرطه دافعت عن أرضها
في المقاومة ضد الاحتلال
صمدت لآخر نفس
بكل مروءة وإستبسال
خمسه وعشرين يناير
يوم الإحتفال بعيدها
وعيد لكل الأجيال
جيشنا العظيم
من أرضها عبر القتال
هزم إسرائيل
وحطم خط بارليف المحال
بلدى معلمه
فى قلب الصغير والكبير

تشوفها تعشقها
من القنطره لفاید للتل الكبير
فى الفن والرياضه والأدب
صنعت نجوم كثير
ع السمسيمه
عزفت أحلى الألحان
على أثار البهجه والوجع
غنوا للفرح والأحزان
بلدى شبابها كله همه
مايعرفشى المستحيل
طول عمرهم حريفه
فى الكوره من جيل لجيل
فن وحرفته
وأحلى م البرازيل
قالوا عنها

مدينة السحر والجمال
فيها البحر
والخضرة والميه
قالوا عنها
باريس المصريه
فيها الشواطئ والمتاحف
والسفن فى القنال
رايحه وجايه
يا محلا جمالها
فى ساعة عصريه
بلدى عروس القنال
واسمها إسماعيليه

رساله الى أمى

أمى العزيزه الغاليه
أمى الأصيله الصابره
يانجمه فى السما عاليه
يانسمه ربيع صافيه
صوتك دفا وحنيه
وقلبك حنين فيا
بحبك يا أمى
وحبك جوه قلبى وفى الروح
وعايش معايا فين فين مابروح
ما إنتى فى حياتى وعمرى
طبيب يداوى جروح
وان يوم يا غاليه تعبتى

أحس إن أنا مدبوح
ما لجنه تحت أقدامك
وأنا لو هعيش
طول عمرى خدامك
مش هقدر أعوض صبرك
ولا عطفك ونبع حنانك
ما إنتى اللى حبك
بيجرى فى دمي
وإنتى اللى حضنك
ينسينى كل همى
عايش بدعاكى ورضاكى
وبدعى ربى يسلم خطاكى
ويدوملى دعاكى
حبى ليكى حب حصرى
حب عصرى حب أصلى

حب عایش جوہ منی
والنہارده جای فی عیدک
جای اُبارک جای اُهنی
جای وجایب اُحلی ہدیہ
لست الحبابب اُمی

جای اقول لك

إن صوتك جوه بيتنا
بيحسنى بالأمان
ما إنتى أصلك نوارتنا
وف حضنك الطيبه والحنان
واما اقوم الصبح بدرى
وألقي نور مالى المكان
أول حاجه تشوفها عيني
هيه إنتى
أصل الحياه ملهاش وجود
من غيرك إنتى
وف ختامى
عايز اقول لك كلمتين

بحبك يا أمى
ساكنه فى القلب والعين

وحشانی یامہ

رغم سنين الفراق
عمرى ما نسيته فى ثانيه
لسه قلبى فى اشتياق
لسه صورتك عايشه فىا
مهما طال بينا البعاد
لسه باعلن فى الحداد
لسه فاكرو برضوا عيدك
وأهديكى وردة فى الميعاد
وأقرا فاتحه فى يوم رحيلك
وادعى ليكى فى الصلاه
وحشانى يامہ
واحشنى العطف والضمه

واحشنى اللقمه واللمه
من إديكى الشقيانين
قلب صافى وحضن دافى
كلهم طيبه وحنين
شفت فيهم عمرى كله
حلم بكره والسنين
إحساس أمانى والدفا
نbec الحنان والوفا
والعينين السهرانين
وحشانى يامه
الف رحمه ونور عليكى
ياللى قلبى بيناديكى
بعد منك صعب الاقى
حضن دافى يضمنى
صعب الاقى قلب صافى

يشعر بقلبي يحسنى
يشيل هموم الدنيا عنى
ويداوى جرحى فى محنتى
يا أغلى وأعز الحبايب
يا حب عمرى اللى غايب
وحشائى يامه

أغنية سينا

سينا يا سينا يا أرض الخلود
يانبع الحضاره يامهد الجدود
رملك معطر بدم الجنود
وشمسك تنور تفتح ورود
ما إنتى اللى فيكى حاربنا آسينا
وسالت دمانا عشانك ياسينا
يا أرض الكنانه يا أرض الصمود
وفيكى هزمننا جيوش اليهود
سينا يا سينا يا أرض الخلود
يانبع الحضاره يامهد الجدود
هعمر فى أرضك وأحشد حشود
وأخضر رمالك لحد الحدود

وهابنى مصانع وأشيل القيود
بإدين شبابنا الرجال الأسود
يرجع زمانك وفجرك يعود
وتعيشى يا حره وعدلك يسود

سينا يا سينا يا أرض الخلود
يانبع الحضاره يامهد الجدود
إنتى أماننا اللى جاى فى الحياه
طريقنا لبكره وطوق النجاه
يابخته اللى فيكى نال الشهاده
وتسلم إدين الجنود والقياده
واللى يعاديكى بيحفر فى قبره
أصبح عدوى ومصيره الإباده
سينا يا سينا يا أرض الخلود
يانبع الحضاره يامهد الجدود

دائماً فى القلب

جوه القلب وجوه العين
شايلى إسمك يا فلسطين
راسم علمك بين أحضانى
وادعى إلكى فى كل صلاتى
إمتى هيجى صلاح الدين
ينصر شعب صبر لسنين
شعب بينزف علشان حقه
ويسيل دمه فى الميادين
من عدوانى بينهب أرضه
ينهش لحمه ويهتك عرضه
فين الرحمه وفين الدين
دمك غالى يا فلسطين
بدعى يارب الكون يا معين
صبر أم ضناها أستشهد

برصاص غدر من الخائنين
أب وأسره ضربوا بيوتهم
ماتوا فى عز ما كانوا نايمين
ماسبوش طفل بيجرى ويلعب
وف مدرسته قوام نسفوه
عمر الشر فى يوم ما هيكسب
وطعم الظلم مسيره يموت
هيه سحابه وبكره تفوت
غزه يا غزه يا رمز العزه
أرضك طاهره بدم الشهده
عشتى يا حره يا واقفه وصامده
ع العدوان الغاشم صابره
إحنا الشعب اللى ما بيخافش
وحقك راجع بكره أكيد
وهنتجمع سوا فى القدس

الشعب العربى الإيد فى الإيد
وف أحضان الأقصى نصلى
فجر جديد وصلاة العيد

ثورة يونيو

أنا اللي بحبك

واعشقتك

ومهما يزيد عنادك

وغضبك

لا يمكن في مره

أكرهك

أنا الشهيد اللي دمي

روى ترابك

وأراضيكي

حلفت لأحررك

يا بلادي

وبدمي وروحي

أفديكي

كنت التمرد

ثوره فى شوارعك

وحواريكى

ويوم ثلاثين

شفت الفرحة

فى عنيكى

بإدين ولادك

وشعبك النايير

رجع الحلم

اللى إتسرق

فى ثورة يناير

ثوره قامت

علشان نعيش

رجعت الأمل ليكى

حماها الشرطه والجيش

ورجعت أحلامك وأمانيكى

وأنا كنت لك
طوق النجاه
وكفنى كان علمك
لجل ماتنولى الحياه
ما إنتى العظيمه
وعظمتك
تفوق الحدود
رجالك نسائك
شبابك أسود
بيبنوا فى تاريخك
ومجدك خلود
كسروا الحواجز
فكوا القيود
وف ميادينك
أقامو الحشود

ملايين ونزلوا
يهتفوا بعلو الصوت
أرحل...أرحل
زلزلت ميادين السكوت
رفعوا كارت أحمر
للظلم والجبروت
ماشفتش لشعبك
مثيل فى الوجود
بأيده يغير
ويزرع ورود
ويحصد فى خيرك
وعداك يسود
أرض الكنانه
وحبك فروض
فخور إنى مصرى

وابنك ياغاليه
ومروى بنيلك
ورايك عاليه
عظيمه يامصر
وعظمتك
تفوق الحدود
وأجمل مافيكي
شبابك وجيشك
قاده وجنود

شباب 25 يناير

إحنا شبابك يا بلادي
رافعين علمك فى العالى
مصر الحره هتفضل فوق
عالى وعالى وعالى الصوت
واللى هيهتف مش هيموت
أخرج عبر واطلب حقك
أحسن ما تموت رعب وخوف
ما إحنا تعبنا سنين وسنين
روحنا وجينا شمال ويمين
أتاريهم كانوا بيعشونا
لما بقينا مش عايشين
سرقه ونهب وظلم سنين
فين الرحمه وفين الدين
دول قتلونا فى الميادين

ودمنا غالى يامصريين
عالى وعالى وعالى الصوت
واللى هيهتف مش هيموت

إحنا شباب 25

قلبنا ابيض ذى البرق
دمنا صافى بلون الورد
وبنوعدكم وعد الحق
مش راجعين لو حتى نموت
مابقاش فيها خلاص سكوت
صوتنا هيفضل دايماً على
للفاسدين دايماً هيعالى
ولايفرقشى معانا الموت
عالى وعالى وعالى الصوت
واللى هيهتف مش هيموت
مصر الحره هتفضل فوق

حكاية ميدان

كان يوم ميلادى
يوم ميلاد مصر القويه
لما انتصرنا ع الفساد
وندينا بالحرية
لما أسقطنا النظام
بإرادته شعبيه
لما دويينا الآلام
والصرخه كانت عفيه
قولنا لأه بالكلام
هما ردو بالرصاص
إحنا رافعين الأعلام
هما جابوا كام قناص
فى سنين كتيره فى عمرنا
توهنا فيها فى الزحام

أنا كنت واقف فى الميدان
اللى مات فيه أخويا
هوه ده نفس المكان
اللى ضحى فيه أبويا
وكانت واقفه جنبى
شهيدة عصرها
صرخت وقالت حقى
فهدروا دمها
شفت ناس متجمعين
ناس غلابه ومحتاجين
بيطالبوا بحقهم
شفت أب عشان عياله
جاي وعايذ رزقهم
شفت ام ضناها مات
واخده صورته فى حضنها

عائشه ع الذكريات
والدموع على خدها
تبكى مهما تبكى
وتصرخ مهما تصرخ
ما هي عايزه حقها
شفت مسلم فى الوضوء
والمسيحي يصلوا
قام وصلى فى الميدان
والمسيحي أمنوا
كلهم متجمعين
فى حب مصر موحدين
هما دول المصريين

فرعون

قالوها فى الامثال
يا فرعون مين فرعنك
كان الجواب ع السؤال
ملقتش حد يلمنى
كتير بنحلم
ونبنى الأمال
والغلطه جايه مننا
طول عمرنا متفرعين
والفرعنه فى دمننا
على مر السنين
طلع عين
أبونا وأمننا
بنصنع بإديننا
فرعون

ونقول بكره
هينصفنا
وعشان الكرسي
ملعون
يتحول لغول
وينهبنا
نقول الحق
ونخش السجون
ونموت من الفقر
وتزيد كل يوم
أوجاعنا
والحزن يعشش
ويسود
ملعون أبوه
السكوت

خلا الظلم موجود
والعدل جونا
ينسحب ويموت
واحنا اللى باديـنا
بننـدى أنفسنا
أصبحت حياتنا
بلا معنى
نصرخ نقول الآه
ومين هيسمعنا
مفـيش غيرك
يارب الكون
ندعيلوا يرعانا
ويحفظ بلدنا
دا الحلم
مات جونا

والكلمه محبوسه
عائشين فى أحزاننا
والفرحه مكبوته
بنغرق فى دوامه
ونتوه فى ميت حدوته
والدنيا بقت
تشبه الغابه
وعشان جنبه يعيش
يمص دم الغابه
ويطلق علينا
الكلاب والديابه
فيموت الشريف
ويعيش الخسيس
وتفضل الساقيه
قلابه

بين الحياه والموت

لانى إتولدت
بحبك واعشقتك بالفطره
ولان عشقتك
جوايا سابق الفكره
قالولى تعشق قمر
قولت أنا بحبها مفتون
وبرغم إختلاف البشر
فى الشكل والمضمون
لسه بخاف القدر
يحرمنى أحلى عيون
مقدرش أشوفك بتبكى
م الوجع ومابكيش
واما جابوا الطبيب
يعالجك

قولت يمكن
على إيديه تعيش
طلع بيتعلم فيكى
وأخطأ التشخيص
كتب لك رويته
قسمت وفرقت
فى أعضائك
ماهو أصل الدوا
كان رخيص
كنت شايف آلامك
بتزيد ما بتخفيش
كان لازم أصرخ
بعلو الصوت
بدل مايقولوا
طلع ندل

وساب
حبیبته تموت
حلفت
لأدویکی بادی
ما أنا منك
وانتی منی
وغالیه علیا
ولو تموتی
أموت معاکي
فی اللحظة والثانیه
ما أنا زهرة شبابك
أنا جيشك وحراسك
أنا اللى بفدیکی بحياتی
ولو هموت
على ترابك

هموت مرتاح
هيبقالى
صفحه فى كتابك
وقصة كفاح
وعشان موتى
كان جراه
ومش خوف
هتشوفى بعدى
فى الشوارع
ملايين وألوف
هيداو جرحك
وينصروكى
ويدافعوا عنك
ويحموكى
وساعتها هيقولوا

مات شهيد الولد

ماهنشى عليه

تموت حبيبته

فمات هو

وعاشت هيه

أوبريت/ مصر بتفرح

مصر بتفرح يالا يا شعب
ارفع رايتك عدى الصعب
قول بالقلب وقول بالحب
تحيا مصر تحيا مصر
ام الدنيا وقد الدنيا
كلمه وقالها زعيم العصر
ايدى فى ايدكوا يا ولاد بلدى
نعبر بيها من نصر لنصر
تحيا مصر تحيا مصر

لما زعيمنا الرئيس قال
عايزين نحفر تانى قنال
خرج الشعب وبالملايين
قالو ده حلم بقالو سنين

وبأموالنا وايد عمالنا
قمنا حفرنا احلى قنال
وبنهديهها لروح شهدائنا
ورجال الجيش الابطال
تحيا مصر تحيا مصر

فى السويس وف بورسعيد
وعروس القناه اسماعيليه
شريان حياه بالخير جديد
سفينه رايعه وسفينه جايعه
تحكى عنا فى كل ميناء
عن شبابنا وعن اهالينا
وتقولها للدنيا قويه
مصر بتنهض كل ثانيه
تحيا مصر تحيا مصر

مصر بتقولك ياريس
افرش طريقك بالأمل
خالى ولادها تعيش كويس
وإبدأ كفاحك بالعمل
انشر بإيدك علم لينا
واعبر حدود المستحيل
وبالشباب عمر فى سينا
تأيدنا ليك اكبر دليل
تحيا مصر تحيا مصر

عشت يابطل الثوره بجد
ياللى حميت البيت والعرض
صنت الأرض وصنت العهد
واحنا معاك دايم ع الوعد
شيفينك فى عرابى وناصر

شيفينك فى صلاح الدين
وف ثورة ثلاثين من يونيو
كنت الحارس كنت امين
تحيا مصر تحيا مصر

إيدنا فى إيدك نبني بلدنا
ونخليها فى شكل جميل
نزرع فيها ونحصد خيرها
راح نسقيها بنهر النيل
عاش ابطال الشعب المصرى
شعب العزه ومجد اصيل
رافع علمه بكل إرادته
ويعليها جيل ورا جيل
تحيا مصر تحيا مصر

تحية حب لجيشنا الوطنى
الى بيحمى وليه بطولات
قال بلادى تعيش واموت
مهما ان كانت تضحيات
سينا هتفضل طاهره وحره
ولأولدنا فى خير وامان
راح نفديها بضى عنينا
والارهاب مايكون له مكان
تحيا مصر تحيا مصر

بالاخلاص والحب نعيش
شعب عظيم مع شرطه وجيش
مش هتفرق بينا جماعه
خاينه بتاخذ ولا تديش
عايزه تفرق بينا وتحكم

بالتدمير وفتاوى ابليس
واحنا جموع الشعب المصرى
حالنا يبكى ويبقى تعيس
تحيا مصر تحيا مصر

احنا جموع الشعب المصرى
مسلم قبطى ليوم الدين
إيد فى الإيد حنعلى ونبنى
مصر بلدنا فى حصن متين
مصر بتفرح يالا يا شعب
ارفع رايتك عدى الصعب
الإنجاز فى طريقنا وقرب
كلمه بقولها وجايه من القلب
تحيا مصر تحيا مصر

كأس العالم

ميت مليون بيقولوا يارب
أحفظ وانصر دايمي مصر
كل دعاهم كان م القلب
وربك واحده عليم بالأمر
وإحنا الشعب صبرنا ونولنا
وادی ولادنا جابولنا النصر
ياللى رفعتوا علمها بحب
حلم اتحقق بعد سنين
كأس العالم لينا اهو طب
بعد غياب من جيل تسعين
إفرحوا يالا وقولوا م القلب
عاشت مصر يامصريين

مين كان يصدق

مين كان يقول
الحلم الصعب يتحقق
والفكر سارح ومشغول
الخوف مسيطر ع الحكايه
والحزن شارد فى العقول
وعيوننا قاعده مركزه
لآخر دقيقه ع النهايه
وفجأه تحصل معجزه
والنصر ييجى فى ذهول
الفرحه مغموره بدموع الإنتماء
والصبر مفتاح القبول
وعنوان البطوله والاداء
خطه عملها مستر كوبر
ركز فيها بكل فلاح
جاب النصر فى شهر اكتوبر

بالفرعون المصرى صلاح
ويا الحضرى السد العالى
والعيبه قاموا الأفراح
نصبوا السيرك شمال ويمين
علشان مصر الغاليه تعدى
كل الصعب يامصريين

الشاعر فى سطور

الأسم / ولید السید حسین عطوة والشهرة

شاعر الثورة/ ولید المصرى

ولد فى 1978/6/20 بقرية سرايوم

بمركز فايد محافظة الاسماعيلية

شاعر الثورة بميدان التحرير

مدير الصفحة الثقافية بجريدة الجمهورية الآن

عضو جمعية مبدعى مصر وموسوعة شعراء العامية

عضو رابطة الزجالين وكتاب الأغاني

عضو نادى أدب قصر ثقافة الاسماعيلية

مشرف لجنة الأدب بساقيه غنيم للتنوير

سكرتير عام لجنة الشباب بحزب الوفد بفايد

عضو رابطة اقلام بلا قيود

عضو رابطة لآلىء القناة الأدبية

له ثمانية دواوين صدر منهم ثلاث دواوين مشتركة

وخمس دواوين خاصة (احلام الفتى الثائر_ مين حبها قدى_

بين الماضى والحاضر_ مربعات المصرى_ حروف الجر)

قبل وبعد ثورتى 25 يناير و30 يونيو

تحت الطبع

حصل على كأس شاعر الميدان

من رابطة فنانى مصر بميدان التحرير

حصل على لقب امير الشعراء العرب لعام 2017
فاز بالمراكز الأولى فى العديد من المسابقات
على مستوى مصر والوطن العربى
وتم تكريمه كشاعر الثوره بمهرجان الاسكندريه
والعديد من المهرجانات
شارك فى العديد من المؤتمرات والملتقيات الثقافية
نشر له العديد من الأعمال بالصحف والجرائد القومية
أذيع له الكثير من الأعمال بالفضائيات والإذاعة والتلفزيون
عمل كشاعر غنائى وله بعض الأعمال الفنية والغنائية
شارك بجميع المظاهرات
منذ ثورة 25 يناير 2011 حتى ثورة 30 يونيو 2013
للتواصل مع الشاعر / 01003616991

محتوى الكتاب

م	المحتوى	الصفحة
1	بطاقة الكتاب	2
2	إهداء	3
3	مفتتح	4
4	هويس	5
5	مركب العشاق	8
6	نفس المكان	10
7	مين حبها قدى	13
8	سؤال وجواب	18
9	دواير حياة	20
10	شدى حيلك	24
11	شهيد الوطن	26

31	ارهاب	12
33	شعب القنال	13
37	السويس	14
38	يوم العبور	15
42	خير أجناد الأرض	16
45	باعشقتك	17
48	بسملة أمل	18
51	لمسة وفاء	19
55	رسالة إلى امي	20
58	جأى أقول لك	21
60	واحشاني يامه	22
63	أغنية سينا	23
65	دائما في القلب	24
68	ثورة يونيو	25

73	شباب 25 يناير	26
75	حكاية ميدان	27
78	فرعون	28
82	بين الحياه والموت	29
87	أوبريت / مصر بتفرح	30
93	كاس العالم	31
96	الشاعر فى سطور	32
98	محتوى الكتاب	33